

Informador a bolbe haci invitacion na MEP

Dialuna awor MEP y AVP lo sinta na mesa

ORANJESTAD(AAN) -- Informador mr. Henny Eman a bolbe haci un invitacion na MEP pa un reunion dialuna 9 di Februari hunto cu AVP.

Informador ta spera cu e reunion aki lo sigui pa asina e dos partidonan sinta na mesa y mira si por forma un gobierno entre AVP y MEP. DIARIO a haya copia di e carta di Henny Eman a manda pa Refunhol kende ta encabeza e delegacion di MEP. E carta ta papia pa su mes.

Relaciona cu e carta cu mi a ricibi di e hefe suplente di e delegacion di MEP, ing. E. Briesen, den cual ta pidi un contesta por escrito riba e carta di MEP di dia 28 di januari, lo siguiente.

Basa riba e encargo di Gobernador di Aruba pa investiga e posibilidad di forma un gobierno cu un base amplio den parlamento, mi a cuminsa hiba combersacionnan cu boso delegacion y cu delegacion di AVP dia 23 di December 1997. Den cuadro di e encargo di informacion aki mi a suministra riba peticion di boso delegacion tur informacion pidi. E di dos reunion planca pa dia 7 di januari a worde posponi riba peticion di boso delegacion pa haya informacion adicional. E informacion adicional aki a worde suministra.

Partido MEP a duna di conoce su punto di bista pa formacion di un gobierno cu AVP den boso carta di dia 28 di januari 1998. E escencia di e posicion di e partido MEP ta cu e ta dispuesto pa forma un coalicion cu un base amplio cu e partido AVP. MEP ta haya sinembargo cu falta confianza entre e dos partidonan MEP y AVP. Pa e motibo aki mester crea un base di confianza entre e dos partidonan grandi y pesey ta propone pa forma un 'zaken kabinet' pa un fase transitorio prome cu yega na un gabinete politico cu AVP. Mi mester remarca cu e carta di partido MEP di dia 28 di Januari ultimo, no tabata contene ningun pregunta.

Den cuadro di mi encargo como informador mi a comunica e posicion di MEP na e partido AVP y a pidi AVP su punto di bista riba e proposicion di MEP manera poni den e carta di MEP di dia 28 di januari. Diamars dia 3 di Fe-

bruari mi a reuni cu e delegacion di e partido AVP pa tuma nota di nan posicion pa formacion di un gobierno cu MEP. E posicion di e partido AVP ta encera cu e ta wak cu tin espacio pa yega na un acuerdo di gobernacion basa riba un coalicion AVP-MEP. Sinembargo partido AVP tin dificultad cu e concepto di un gabinete 'a-politico' ya cu segun AVP, esaki ta constitucionalmente imposibel. AVP a muestra di ta comprende e motibo di MEP pa crea e condicionnan pa kita e desconfianza cu MEP ta señala. Pa cuminsa solucion e obstaculo di falta di confianza cu e partido MEP ta menciona como motibo pa no forma un gobierno cu AVP mes ora, AVP a propone pa e dos partidonan sinta hunto pa delibera riba e diferente modalidadesnan pa loke ta toca e caracter di un gobierno AVP-MEP y pa formula un programa di gobernacion basa riba e programanan di e dos partidonan. AVP ta di opin-

ion cu na mesa por kita posibel diferencianan cu por tin entre e puntonan di bista di e dos partidonan y aclarea posibel impresionnan cu ta existi serca di ambos partido. A base di e posicion di AVP y di e carta di MEP di dia 28 di Februari, mi a haya cu tin suficiente base pa trece e dos partidonan hunto, pa purba seriamente pa yega na un gobierno manera delinea den mi encargo como informador. E invitacion na e partido MEP y AVP pa reuni diaranson 4 di Februari tabata netamente pa cuminsa cu e combersacion entre MEP y AVP, pa delibera den un forma habri y directo tocante e diferente puntonan di bista riba caracter y programa di un gabinete AVP-MEP, pa asina por yega na un gobernacion cu tur dos partido lo por sostene. Diaranson mainta 10:00 or den e reunion cu partido AVP pa cual tambe e partido MEP tabata invita, partido AVP a duna di conoce cu AVP lo ta dispuesto pa kita e distancia

cu tin encunto e caracter di un gobierno AVP-MEP, den sentido cu AVP lo kier propone na MEP pa pone dos di e nueve carteranan disponibel pa dos minister cu lo bin di sector priva. Esta uno di sector empresarial y uno di sector sindical. Cu e gesto aki lo por yega dentro di e cuadro di nos constitucion, na un gabinete cu ta carga tur responsabilidad politico, manera nos constitucion ta prescribi, pero cu envolvimiento di gremionan. Esaki segun AVP, lo fortifica e gabinete door di amplia su base y alavez lo yuda kita e desconfianza cu segun MEP falta y evita polarisacion innecesario entre e dos partidonan den futuro. Cu esaki lo logra e mesun meta cu MEP tin cu su proposicion di un 'zaken kabinet' a-politico. E delegacion di AVP a remarca cu den un constelacion asina, AVP lo perde su mayoria den gabinete. Partido AVP a haci un peticion na mi persona, pa informa partido

MEP di su posicion y un biaha mas a ripiti su disponibilidad pa den combersacionnan directo y habri, intercambia di pensamento cu partido MEP, pa asina nos por yega na formacion di un gobierno cu un base amplio y stabil, cu por tuma tur decision pa corto y largo plazo na bienestar di nos pais.

Considerando e importancia pa yega mas liher posibel na un gobierno solido y cu un base amplio pa nos pais, mi ta ripiti e invitacion na boso delegacion pa e reunion cu partido AVP manera mencion den e carta aki, pa dialuna 9 di Februari awor pa 10:00 or di mainta na kazerne di brandweer na Tanki Leendert.

DIARIO

**BLAUW, GEEL, VERDE
PA CÔRO MÊ VOY!!**

